

Dithero tsa Tirelano mo Kutlwanong

48/2014 Thero ka Sontaga wa 14 morago ga moletlo wa Modimo o o Borarobongwe, e le ka 28. 09. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

Lefoko le le okamelang beke eno le kwadilwe mo go Pes. 103:2, le re: **"Baka MORENA, mowa wa me, se lebalesepe sa ditiro tse di molemo tsa gagwe!"**

1. Sefela sa 187 - 173/180
2. **Thapelo:** Morena, o re itshepise mo boammaaruring jwa gago. Lefoko la gago ke la boammaaruri. Amen.
3. Lefoko la Testamente e kgologolo le kwadilwe mo go Genesi 28:10-19a;

Epistolo ka fa thulaganyong ya 2 e kwadilwe mo go Baroma 8:12-17

Efangele ka fa thulaganyong ya 1 e kwadilwe mo go Luka 17:11-10
4. A go ipolelwe tumelo ya bokeresete!
5. Sefela sa 184 - 170/177
6. Thapelo ya mmadi wa thero.
7. **Epistola** ka fa thulaganyong ya 6 e kwadilwe mo go 1 Bathesalonika 5:14-24; e re ABakaulengwe, re lo kaela re re: Kgalemelang ba ba bofafalele, nametsang ba ba nyemang moko, tlhokomelang ba ba bokoa, lo nne pelotelele le botlhe. Tlhokomelang gore go se nne ope yo o busetsang yo mongwe bosula ka bosula, mme tlhoafalang ka gale go direlana molemo le go o direla botlhe. Iturmeling ka gale. Se khutleng go rapela. Lebogang mo dilong tsotlhe; gonne moo ke thato ya Modimo mo go Keresete Jesu ka ga lona. Se timeng Mowa! Se nyatseng dithuto tsa Lefoko la Modimo. Tlhotlhomisang tsotlhe, lo boloke tse di siameng. Fapogang mofuta mongwe le mongwe wa bosula. Mme a Modimo wa kagiso ka osi o lo itshepise gotlhe; a mewa ya lona le matshelo a lona le mebele ya lona di bolokwe,

e nne tse di itekanetseng, di se na molato mo go tleng ga Morena wa rona Jesu Keresete. Ona o o lo bitsang o a ikanyega, o bile o tla dirafatsa.@ Amen.

8. Thero: Baratwa mo Moreneng wa rona Jesu Keresete, phuthego e e rategang ya Morena Jesu, moapostolo Paulo o khutla lokwalo lwa ntlha lwa gagwe go Bathesalonika ka mafoko ao. O kopanya dikakanyo tsa gagwe ka bokhutshwane. Re ka re: O kopanya tse di mo pelong ya gagwe ka go tlhotlhelediwa ke Mowa o o Boitshepo, a re: Lebogang! Itumeleng! Rapelang! Mme re a lo kaela, bakaulengwe gore lo kaele ba ba sa tsamayeng ka fa molaong, lo kgalemele ba ba bofafalele, lo itumedise, lo nametse ba ba nyemang moko, lo tlhokomele ba ba bokoa, lo nne pelotelele le botlhe!@ Mo phuthegong ya Morena re mmele o le mongwe, nna le wena re ditokololo mo mmeleng wa ga Jesu Keresete. Ka moo ke modiredi wa gago, wena o modiredi wa me. Re thusanya jalo go ya mo legodimong. Wena o a ntlhagisa, nna ke a go tsoseletsa, ke re: Tlhokomela! Kotsi ke e! Re thusanya jalo mo tseleng e e yang kwa legodimng. Ga o buse mowa wa me. Le nna fela jalo, ga ke ikgodise mo go wena.

Re a direlana, nna, le wena; wena le nna. Re thusanya mo Moreneng, jaaka Morena a re diretse mo tshimologong, jaaka ene a re ratile, le rona fela jalo. Re sala Mopholosi wa rona Jesu Keresete morago. O re ratile thata mo go kalo gore a re swele, e nne Motlanka wa Modimo, e nne Modiredi wa rona rotlhe. Ke ene Moruti wa rona. O a re ruta. Rotlhe re ithuta mo go ene. Re amogela thuto e e boitshepo ya gagwe. Ga re baatlhodi le babusi ba phuthego ya gagwe, mme re ba ba golotsweng, ba ba pholositsweng. Ke mopholosiwa mmogo le wena. Wena o pholositswe jaaka nna. Nna ke itshwaretswe mmogo le wena. Wena o utlwetswe bothoko jaaka nna. Ka bobedi jwa rona re baleofi ba ba golotsweng mo melatong ya rona kwa Golegotha mo sefapaanong. Re tswa mo sefapaanong, ka bobedi jwa rona. Ke kwa re amogetsweng teng ka bopelotlhomogi. Ka moo re tiisanya mo tseleng, re disana ka lorato le ka tlhokomelo ka ntlha ya ga Keresete. Efangele e a re goga, e re fentse jalo. Bopelotlhomogi jwa Morena bo re kgweetsa jalo. Ke rata gore o tshele ka ntlha ya ga Keresete, ka kwano le koo. Le wena o nkeletsa letlhogonolo le, ke raya pholoso e e sa khutleng.

Mme re a lo kaela, bakaulengwe gore lo kaele ba ba sa tsamayeng ka fa molaong wa Modimo. Kereke e a lwala. Rotlhe re itse seo. Ka lebaka la eng? Go lebalwa ba ba tlogetseng phuthego. Ga ba tlhokomelwe ba ba kgaotsweng. Ba nyadiwa ba ba tlogetseng kereke. Mofarisai yole o ne a reng mo tempeleng? O ne a ema, a ithapelela ka gore

A Modimo, ke a go leboga, ka ke sa tshwane le batho ba bangwe, e bong dinokwane le basiamolodi le bagokafadi, gongwe jaaka mokgethisi yo. @ Rona re dirang? Batho ba le bantsi ba phuthego ya rona ba timetse koo kwa ntle ga phuthego. Monnao o kae? Kgaityadiago o kae? Kaine o na a reng? A re: A Ga ke itse. A ke modisa wa ga nnake? @ Lefoko leo le ntse fa pele ga rona kajeno. Le batla karabo mo go nna le mo go wena.

A Bakaulengwe, re lo a kaela, re re: Kgalemelang ba ba bofafalele! @ Ke re: Re a ba itse. Mme ga re rate go thusa ka go tsamaela magodu, bagokafaedi, babolai ba ba tshelang fa gare ga rona. Ga re rate go thusa go tsamaela batagwi le ditshwakga. O tla araba jang koo mo go le le tlang, fa o tla bodiwa ka gore: Mokaulengwe wa gago o kae? Ba tla latlha ka bosakhutleng, fa re sa bue le bona. Mme re tlwaetse go nna mo kerekeng e ntle ya rona ka kagiso, re didimetse fela, re tshikinya magetla, re re: Ga re re sepe. Ke modumedi yo o ntseng jang, fa tlalelo e e sa buegeng ka kwa ntle koo e sa ame pelo ya me? Wena o modumedi yo o ntseng jang, fa pelo ya gago e tsidifeste fela, e thatafetse jaaka letlapa? Ditiro tsa rona di rerang? Mme, bakaulengwe, re a kaelwa ka gore: Kalemelang ba ba bofafalele! Ke mang yo o tla thusang go ba rapelela, le go ba kopela ka metlha, ba ba tlhomolang pelo bao? Kana baruti ba lona ba tlhoka diatla tsa rona, ba tlhoka melomo ya lona, ba tlhoka bopelonomi le dipelo tsa lona.

A Bakaulengwe, re lo a kaela, re re: Kgalemelang ba ba bofafalele, nametsang ba ba nyemang moko, tlhokomelang ba ba bokoa, lo nne pelotelele le botlhe ka ntlha ya ga Keresete, bakaulengwe, ka ntlha ya ga Jesu Keresete, Mopholosi wa mewa ya rona. Tlhokomelang gore go se nne ope yo o busetsang yo mongwe bosula ka bosula, mme tlhoafalang ka gale go direlana molemo, le go o direla botlhe, @ ka ntlha ya ga Keresete, bakaulengwe, ka ntlha ya ga Jesu Keresete, Morekolodi wa mewa ya rona. A Itumeleng ka gale! Rapelang ka metlha! Lebogang mo dilong tsotlhe; gonne moo ke thato ya Modimo mo go Keresete Jesu ka ga lona. Itumeleng! Rapelang. A go diragale ka ntlha ya ga Keresete, bakaulengwe ba ba rategang, ka ntlha ya ga Jesu Keresete, Morekolodi wa mewa ya rona. A Se timeng Mowa! Se nyatseng thero ya Lefoko la Modimo. Tlhotlomisang tsotlhe, lo boloke tse di siameng. Fapogang mofuta mongwe le mongwe wa bosula. A go diragale ka ntlha ya ga Jesu Keresete, Morwa Rraetsho, le Mogomotsi le Modisa wa mewa ya rona.

A Mme a Modimo wa kagiso ka osi o lo itshepise gotlhe; a mewa ya lona le matshelo a

lona le mebele ya lona di bolokwe, e nne tse di itekanetseng, di se na molato mo go tleng ga Morena wa rona Jesu Keresete. Ona o o lo bitsang o a ikanyega, o bile o tla diragatsa. @ A re utlwa tseo? Tse di kwadilweng fano mo bokhutlong di re gomotsa bogolo go tsotlhe tse dingwe. Re abelwa thata go diragatsa tsotlhe tse re di utlwileng kajeno. Re abelwa go kgona go dira tse di tshwanetseng go dirwa mo phuthegong ya rona. Re khubame ka mangwele, re ipolele maleo a rona, re kope boitshwarelo mo leineng la ga Keresete, re utlwe Lefoko le la kgomotso: Wena, le fa o le mang, ke go itshwarela maleo otlhe a gago mo felong ga Modimo fa mo leineng la Modimo o e leng Rara le Morwa le Mowa o o Boitshepo. Tloga, o tsamaye ka kagiso!

Mme Modimo wa kagiso, ona ka osi, a o lo itshepise ka botlalo, matshelo a lona le mewa ya lona le mebele ya lona e bolokwe, e nne tse di itekanetseng di se na molato mo go tleng ga Morena wa rona Jesu Keresete. Ona o o lo bitsang o a ikanyega, o bile o tla diragatsa. Ee, a go lebogwe Modimo le bopelonolo jwa ona. O ikanyegile yo o lo bitsang. O tla diragatsa. Ee, a go lebogwe leina le le boitshepo la gagwe jaanong le ka bosakhutleng! Re ratwa mo go kalo gore re tshele, re rate jalo, re tlotliwa mo go kalo gore re tshele, re tlotle badumedi le ba ba sa dumeleng fela jalo! A re tsogeng mo thobalong, re tlogele go otsela, re dire ka ntlha ya ga Keresete ka ntlha ya phuthego e e rategang mo gae. A Modimo o re thuse mo go tseo ka bopelotlhomogi jwa ona! Amen.

9. Thapelo: Morena Modimo, re a leboga, re lebogela Lefoko la gago le le re tsoseletsang, le go re gomotsa, le go re tiisa mo tumelong. O re abele Mowa o o Boitshepo gore re tswelele ka bopelokgale mo tseleng ya gago ya tumelo. O re nonofise go thusa ba bangwe ba ba mo tseleng mmogo le rona, re ba tsoseletse, re ba gomotse, re thuse ba ba tlhokang thuso ya rona. Utlwa thapelo ya rona ka Jesu Keresete. Amen.

Thapelo ya Morena: Rara wa rona yo o mo legodimong ...

10. Sefela sa 182 - 168/176

A kagiso ya Modimo e e fetang thaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. G. Tiedemann, ka ngwaga wa 2008/2014.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.